

香港律師會法律周 2025 開幕禮

日期：2025 年 9 月 14 日（星期日）

時間：中午 12 時至晚上 7 時

地點：天水圍+WOO 嘉湖 1 期地下

會長湯文龍律師歡迎辭

署理律政司司長張國鈞博士、法律援助署署長莊因東先生、
置富產業信託行政總裁趙宇律師、
警務處助理處長，新界北總區指揮官林敏嫻女士
香港立法會議員林新強律師、容海恩律師、謝偉俊律師、
周浩鼎律師、梁子穎先生
各位嘉賓、各位天水圍嘅市民，大家好！

1. 歡迎大家出席香港律師會法律周 2025 嘅開幕禮。
2. 剛才，大家睇到一段關於「平安三寶」嘅影片，其實係香港律師會同香港電台今年合作推出，一共十六集嘅普法教育節目《法律是咁的 2》。
3. 好多市民可能唔知道「平安三寶」係咩，但係佢哋睇完節目後，就知道係代表遺囑、持久授權書同預設醫療指示，呢啲法律並唔深奧，仲同大家係息息相關。
4. 《法律是咁的》由香港律師會同香港電台聯合製作，第一季以電台節目形式推出，聽眾反應熱烈。所以我哋今年再度推出《法律是咁的 2》，將呢個咁有意義嘅普法法治教育系列，推廣至電視、電台、仲有網上平台播放。

5. 如果大家想了解更多法律知識，可以掃呢個 QR Code 網上重溫。
6. 想帶返屋企同多啲人分享？我哋亦會响社區講座之後，向現場朋友贈送我手上呢本咁精美嘅筆記簿，俾大家可以帶返屋企再掃吓個 QR Code。數量有限，先到先得。
7. 好多人問我，點解香港律師會要做咁多法律教育嘅工作。因為香港律師會係法定嘅自我監管機構，負責監管業界嘅操守同標準，同時亦肩負服務社會，推廣法治嘅社會責任。
8. 响呢個大前提下，香港律師會喺 1991 年創立「法律周」呢個旗艦活動，過去 34 年以來，我哋走入香港不同社區，用法律專業幫助市民，推廣普法教育。
9. 今日我哋好榮幸邀請到署理律政司司長張國鈞博士，同埋五位立法會議員出席，分別係林新強議員、容海恩議員、謝偉俊議員、周浩鼎議員、梁子穎議員。佢哋都係司法及法律事務委員會成員，而署理律政司司長張國鈞博士入律政司之前，亦曾擔任過立法會司法及法律事務委員會主席。
10. 今日大家除咗可以去我哋攤位搵義務律師外，都可以趁呢個機會同各位議員現場交流。
11. 或者大家都聽過「法律先行」呢句說話，但點解呢？因為我哋日常生活事無大小，其實都同法律有關。例如市民去便利店買一樽水，就已經涉及《商品說明條例》、消費者權益等等。
12. 今日我哋設立咗攤位，由律師會義務律師為各位街坊朋友提供免費法律諮詢服務，回應市民唔同法律需求。呢項活動由推出至今，一直大受歡迎。大家記得去登記報名。無論係勞資糾紛、樓宇問題、婚姻家事，遺產繼承、合約爭議，又或者係法律責任同法律程序，有乜嘢法律問題，都可以唔明問到明。

13. 另外，根據警方數字，舊年錄得超過 11,500 宗網購騙案，涉及損失 3.56 億元，較前年分別上升三成及接近九成。所以，我哋亦安排咗以「網購」為題嘅社區講座，邀請到新界北總區防止罪案辦公室主任黃長興總督察，教大家做個精明嘅消費者。
14. 我哋亦都安排咗有獎遊戲攤位，無論係大人定小朋友，都歡迎大家一齊參與今日嘅活動。
15. 之後律師會亦都會去到馬鞍山同深水埗，透過舉辦不同嘅專題講座同活動，幫到市民大眾認識法律，培養法治意識，同埋最重要係，可以用法律幫大家解決問題。我希望各位繼續支持律師會嘅公益法律服務工作。
16. 最後，正如今年法律周嘅主題「法治連線，共建未來」。顧名思義，法治係需要唔同持分者一齊合作去推動。
17. 我在此感謝公民教育委員會同法律援助署贊助今次活動。前者致力協助市民培養正面嘅價值觀同公民意識，後者就提供法律援助，令有經濟困難嘅人都可以得到法律服務。
18. 我亦感謝律政司、警務處以及法援署嘅支持，同埋今日在場嘅五位立法會議員。最後，多謝置富產業信託借出今日嘅場地，同埋 40 幾位義務律師、30 位義務工作發展局嘅義工團隊，以及香港律師會秘書處全體人員嘅積極參與。多謝大家！